



## SIUMUT INATSISARTUNI ILAASORTAATITAT

17. august 2012

UKA 2012/90

29. marts 2012

UPA 2012/90

### NAQQIUT

Aningaasanut inatsimmi umiatsiaaqqanik tapiissutigineqartartut amerlasusaanut ersarissaaneq

Inatsisartut Suleriaasianni § 33 naapertorlugu aalajangiiffigisassatut siunnersuut imattoq matumuuna saqqummiuppara:

**Kingusinnerpaamik UKA2012-imik saqqummiunneqartussamik Aalisarnermik piniarnermillu inuussutissarsiutillit inuussutissarsiornerannik siuarsaneq pillugu Inatsisartut peqqussutaat nr. 10, 20. november 2006-imeersumut allangngutissatut siunnersummik Naalakkersuisut saqqummiussinissaannik Inatsisartuni aalajangiiffigisassatut siunnersuut, taamaalluni taamaallaat umiatsiaaqqanut nutaanut Kalaallit Nunaanni sanaartorneqartunut tapiisoqarsinnaasalersillugu.**

(Inatsisartunut ilaasortaq Karl Lyberth, Siumut)

#### Tunngavilersuut:

Kalaallit Nunaanni umiatsialiorfinnik marlunnik Nuummi Maniitsumilu inissimasunik peqarpugut. Taakku tamarmik inuussutissarsiutigalugu aalisarnermut piniarnermillu akuerisaasunik umiatsiaaraliortarput. Taamatuttaaq umiatsiaaqqat taakku Kalaallit Nunaanni pissutsinut immikkuullarissunut naleqqussarlugit sanaajupput, taamaattumillu soorunami Kalaallit Nunaanni atornissaannut naleqqulluartuullutik.

Manna tikillugu Aningaasanut Inatsit aqqutigalugu aningaasanik inuussutissarsiutigalugu umiatsiaaqqanik nutaanik 14-it miss. tapiissutissanik immikkoortitsisoqartarpoq.

Taamaammat taamaallaat Kalaallit Nunaanni inuussutissarsiutigalugu umiatsiaaqqanik sannaanik tapiissutinik tunniussisoqarsinnaanngortillugu Aalisarnermik piniarnermillu inuussutissarsiutillit inuussutissarsiornerannik siuarsaneq pillugu Inatsisartut peqqussutaat nr. 10, 20. november 2006-imeersup allangngortinnejarnissa siunnersuutigaara.

Inatsisartut aalajangiiffigisassatut siunnersumik akuersinerisisa taamaallaat Kalaallit Nunaanni suliffeqarfiit qulakteeneqarnerat kingunerissangnilaa, aammali akuersineq avataanit tikerartitanik annikillisaanermut sunniuteqassaaq.

#### Pisortanut aningaasatigut kinguneqaatissat

Aningaasaliissutit allanngorinneqarnissaat siunertarineqanngimmat, siunnersuutip pisortanut aningaasatigut ajorseriateqarnissamut kinguneqarnissa ilimagineqanngilaq. Taamatuttaaq allaffissornermut kinguneqaatissat annikitsuinnaanissaat ilimagineqarpoq. Siunnersummik suliarinninnissaq, kingornalu allaffissornikkut ingerlatsinerit allaffissornermut sinaakkutit maanna atuuttut iluini suliarineqarsinnaavoq.

Siunnersuut aqqutigalugu suliffissat amerleriaatissaattut ilimagineqartut akileraarutitigut isertitaqarnerulernikkut ikorsiissutitigullu aningaasartutikinnerulernikkut Nunatta Karsiata aningaasanik tigoriaannaataanut iluaqutaanissaat ilimagineqarpoq.

**Inuuussutissarsiortunut innuttanullu aningaasatigut kinguneqaatit**

Kalaallit Nunaanni akuerisanik umiatsialiorneq aningaasanik kaaviiartitsinerulernik kinguneqassasoq ilimagineqarsinnaavoq. Taassuma akerlianik umiatsianik nunani allani sanaanik eqqussuvisut kaaviiartitamikkut taassuma annertoqqataanik kaaviiartitsinikinnerulissasut ilimagineqarsinnaavoq. Taakku saniatigut siunnersuut innuttanut kinguneqaateqartussaanngitsutut ilimagineqarpoq.